

**AWIG-AWIG**  
**DESA ADAT KEBON BUKIT**



**DESA BUKIT**  
**KECAMATAN KARANGASEM**  
**KABUPATEN KARANGASEM**

## MURDHA WAKYA

Om Swastyastu

Purwa pangastungkaran tityang Krama Desa Adat Kebon Bukit, ring buk padan Ida Sang Hyang Widhi maka sangkan paraning dumadi, Bhatara-bhatari sane malingga ring Pura Puseh Desa Adat Kebon Bukit, minakadi Pura kahyangan sami sane wenten sajeroning wawengkon Desa Adat Kebon Bukit, duaning malarapan saking kerta wara nugrahan paduka Bhatara Samudhaya, karya puniki kasidha puput.

Kaping kalih hatur pangayubagian tityang krama Desa Adat Kebon Bukit, pingajeng ring ida dane para Panglingsir, Keliang, Pamangku, minakadi ida dane sang maraga cestakara, widagdha pradnya wicaksana sareng sami, sane sampun sangkaning sueca ledang sareng mapawangun ngripta uger-uger marupa awig-awig Desa Adat Kebon Bukit puniki, pacang kanggen sepat siku-siku sajeroning desa kantos kaungkur wekas.

Taler majeng ring Pamerintah Daerah Kabupaten Karangasem, para manggala sane mastika ngiwang patutang awig-awig, tityang ngaturang pangayu bagia, duaning sampun kasidhan nureksa maritetes saha mastika kantos marupa puput.

Mungguing daging ipun manut Tri Hita Karaṇa, indik kahyangan genah ngadisthana Ida Sang Hyang Parama Wisesa. Indik pawongan pinaka krama desa, indik palemahan pinaka wawidhangan wawengkon desa, mabantang antuk lekita sastra-gama, sasana, pasuara, dresta, minakadi sane sawosan, sane hanut ring pamargin dharma agama kalih dharma nagara. dumadak kasidhan mamangguhang kajagadhitan sakala niskala.

Om santih santih santih Om.

## NIYASA



### ARTOS PRALAMBANG DESA ADAT KEBON BUKIT

1. Bucu Lima pinaka lambang mamanggehang dasar agama hindu minakadi Panca Srada
2. Bucu Tiga pinaka lambang ngamanggehang pamikukuh Tri Hita Karana
3. Meru maundag siki pinaka lambang Desa Adat Kebon Bukit kasanggra antuk siki banjar inggih punika Banjar Kebon Bukit
4. Candi pinaka lambang ngemanggehang kebudayaan ring Bali
5. Bukit pinaka lambang genah krama ngrereh pangupajiwana
6. Swastika pinaka lambang agama sane ke anut ring ikrama
7. Padi lan kapas pinaka lambang gemah ripah loh ginawi jagadhita kepanggih ring wewidangan wiadin ring dure Desa Adat Kebon Bukit.
8. Lingkaran pinaka lambing ngarumaketang sinoman mekadi krama desa sane wenten ring wewidangan wiadin ring dure desa Desa Adat Kebon Bukit.
9. Praja Mandala Amukti Giri antos ipun :  
Praja pateh sekadi krama sane nyanggra Desa Adat Kebon Bukit, Mandala inggih punika gumanti genah, Amukti artin ipun pekaryan Giri saking bahasa sansekerta artin ipun Bukit/Gunung.  
Pemekas semertin Pralambangpuniki nyihnyang, Desa Adat sane kesanggra antuk siki banjar krama sane ring rajeg meagama Hindu saha maikukuhin dasar agama lan bakti ring Ida Sanghyang Widhi ngupadi kejagaditaan kesukertaan skala niskala.

## KATATTWAN DESA ADAT

## WAWIDANGAN DESA ADAT KEBON BUKIT

### PETA DESA ADAT



DAGING AWIG-AWIG  
DESA ADAT KEBON BUKIT

MURDHA WAKYA .....	i
NIYASA .....	ii
KATATTWAN DESA ADAT .....	iii
WAWIDANGAN DESA ADAT .....	iv
DAGING AWIG-AWIG .....	v
PRATHAMAS SARGGAH : ARAN LAN WAWIDANGAN DESA .....	1
DWITYAS SARGGAH : PIKUKUH MIWAH PATITIS TATUJON .....	1
TRITYAS SARGGAH : SUKERTA TATA PAKRAMAN .....	2
Palet 1 : Indik Krama .....	2
Palet 2 : Indik Tata Praja Desa Adat .....	4
Palet 3 : Indik Sangkepan miwah Paruman .....	7
Palet 4 : Indik Kulkul .....	8
Palet 5 : Indik Duen Desa .....	9
Palet 6 : Indik Laluputan .....	10
Palet 7 : Indik Dedosan .....	10
Palet 8 : Indik Bhaya .....	10
Palet 9 : Indik Rarampagan lan Kekeran Desa .....	11
Palet 10 : Indik Panyanggran Banjar utawi Krama Desa .....	11
CATURTAS SARGGAH : SUKERTHA TATA AGAMA .....	12
Palet 1 : Indik Dewa Yajna .....	12
Kaping 1 : Indik Kahyangan .....	12
Kaping 2 : Indik Pangaci-aci .....	12
Kaping 3 : Indik Sukertha Pura Kahyangan .....	13
Kaping 4 : Indik Pamangku .....	14
Kaping 5 : Indik Cuntaka lan Sosot .....	15
Palet 2 : Indik Resi Yajna .....	18
Palet 3 : Indik Pitra Yajna .....	18
Palet 4 : Indik Manusa Yajna .....	20
Palet 5 : Indik Bhuta Yajna .....	20

---

PANCAMAS SARGGAH : SUKERTHA TATA PALEMAHAN .....	21
Palet 1 : Indik Tegal, Bangket lan Karang .....	21
Palet 2 : Indik Kakayonan .....	23
Palet 3 : Indik Wawangunan .....	24
Palet 4 : Indik Wawalungan .....	25
SAT SARGGAH : SUKERTA TATA PAWONGAN .....	26
Palet 1 : Indik Rangkat .....	26
Palet 2 : Indik Palas Makurenan utawi Napyan .....	27
Palet 3 : Indik Balu .....	28
Palet 4 : Indik Santana .....	28
Palet 5 : Indik Wawarisan .....	28
SAPTAMAS SARGGAH : WICARA LAN PAMIDAᅇDHA .....	29
Palet 1 : Indik Wicara .....	29
Palet 2 : Indik Pamidaᅇdha .....	29
ASTAMAS SARGGAH : NGUWAH-NGUWUHIN AWIG-AWIG .....	30
NAWAMAS SARGGAH : PAMUPUT .....	30

**PRATHAMAS SARGAH**  
**ARAN LAN WAWIDANGAN DESA**

**Pawos 1**

- (1) Desa puniki mawasta Desa Adat Kebon Bukit; salantur ipun kinucap kalih kasuratang sajeroning lekita Desa Adat Kebon Bukit.
- (2) Wawengkon prabumian Desa Adat Kebon Bukit mawates nyatur-desa, manut sakadi kinucap ring sor puniki :
  - ha. Tepisiring Wetan utawi Kangin : Panepin Kauh prabumian Desa Adat Seraya;
  - na. Tepisiring Kidul utawi Kelod : Panepin Kaler prabumian Desa Adat Seraya
  - ca. Tepisiring Kulon utawi Kauh : Panepin Kangin prabumian Desa Adat Karangasem;
  - ra. Tepisiring Lor utawi Kaler : Panepin Kelod prabumian Desa Adat Bukit.
- (3) Desa puniki kawangun antuk karang ayahan desa, kasanggra antuk Banjar Adat Kebon Bukit.

**DWITYAS SARGGAH**

**PIKUKUH MIWAH PATITIS TATUJON**

**Pawos 2**

Maka pikukuh Desa Adat Kebon Bukit, ngarajegang, mikukuhin, kalih mitindihin pisan :

- ha. Pancasila.
- na. Undang-Undang Dasar 1945.
- ca. Tri Hita Karana.
- ra. Peraturan Daerah Provinsi Bali Nomor 4 Tahun 2019, Tentang Desa Adat di Bali.

**Pawos 3**

Desa Adat Kebon Bukit ngamanggehang patitis tatujon, luiripun :

- ha. Ngutamayang tata-cara maagama Hindu;
- na. Ngawangunang katreptian sajeroning desa, mangda kasidhan rajeg katreptianing praja;
- ca. Ngawerdiyang kawicaksanan minakadi kapradnyanan, maka larapan gumawe gemuh landuhing praja;
- ra. Ngamanggehang kalih ngawerdiyang padueaning desa, majalaran kawicaksanan guna laksana manut dharma-prawerti;
- ka. Ngarajegang Dharma-Agama miwah Dharma-Nagara.



**TRITYAS SARGGAH**  
**SUKERTHA TATA PAKRAMAN**

**Palet 1**

**Indik Krama**

**Pawos 4**

- (1) sane kasinanggeh krama desa, luire :
- ha. Sang sapasira ugi jenek magenah ring wawengkon Desa Adat Kebon Bukit, lintang ring enem sasih utawi 210 (satak dasa) dina sane rajeg maagama Hindu;
  - na. Sang sapasira ugi wed saking Desa Adat Kebon Bukit, jenek magenah ring liwaring Desa Adat Kebon Bukit, nanging kantun mipil ring banjar utawi Desa Adat Kebon Bukit, sane mula pagenahanianguni.
- (2) Papalihan krama desa, kadi inucap ring sor puniki :
- ha. Krama Ngarep inggih punika krama desa sane bulangkep wed saking Desa Adat Kebon Bukit, sane sampun mipil ring banjar utawi ring Desa Adat Kebon Bukit matata turun cumek saha maayahan saurah-arih;
  - na. Krama Sorpa inggih punika, krama sane durung alaki rabi;
  - ca. Krama Nyada inggih punika krama desa sane sampun tan keni ayahan wit sangkaning pinunas ngaraga tur sampun kalugra antuk Prajuru Desa mawiwit saking :
    - 1) Mabukti sungkan rahat tur tan sidha waras;
    - 2) Antuk lingsir tan sidha maayahan, miwah sampun mayusa 70 (pitung dasa) warsa;
  - ra. Krama balu inggih punika krama desa lanang wiadinistri, sane katinggal seda antuk rabinia, krama desa lanang sane kakaonin nyapian antuk rabine, wenten balu camput lan balu ma sentana;
  - ka. Krama ring liwaring Desa, inggih punika sang sapasira ugi wed saking Desa Adat Kebon Bukit, jenek magenah ring liwaring Desa Adat Kebon Bukit, nanging manggeh mipil ring banjar utawi ring Desa Adat Kebon Bukit;
  - da. Krama Sasabu inggih punika, krama wit saking liwaring desa, jumenek magenah saha makarang paumahan ring wawengkon Desa Adat Kebon Bukit.
- (3) Krama tamiu inggih punika krama sane kinucap ring sor puniki :
- ha. Sang sapasira ugi wed saking liwaring Desa Adat Kebon Bukit, jenek magenah ring wawengkon Desa Adat Kebon Bukit, nanging nenten makarang paumahan;
  - na. Sang sapasira ugi wed saking liwaring Desa Adat Kebon Bukit, makakubon ngenahin palemahan minakadi :tegal, carik, palasan, ring wawengkon Desa Adat Kebon Bukit, nanging kari manggeh makrama desa ring kamulan desania, kabuktiang antuk sewala patra sasinahan saking Kelihang Desania.

- (4) Tamiu inggih punika .
- ha. Sang sapisira ugi magenah ring wawengkon Desa Adat Kebon Bukit, yan tan magama Hindu, tan sareng sapisikramaning Agama Hindu, nanging tan wenang piwal ring Awig-Awig miwah Pararem Desa sane ngindikang tata pawongan kalih tata palemahan;
  - na. Sang sapisira ugi rauh ka jeroning Desa Adat Kebon Bukit, nanging tan nekeh magenah irika, kasinanggeh tamiu ngajag, sang karauhan tamiu patut matur supeksa ring Prajuru Desa yan tan asapunika, Prajuru Desa wenang nundung tamiu inucap mangda matinggal saking desa.

#### Pawos 5

Ngawit tedun makrama desa:

- (1) Krama desa sane mawed saking Desa Adat Kebon Bukit, luire : sampun bulangkep, tur sampun mawiwaha;
- (2) Sang sapisira ugi sane wed saking liwaring desa, magenah ring wawengkon Desa Adat Kebon Bukit, sampun lintang ring 3 (tigang) sasih utawi 105 (satus lima) dina katerag antuk Desa Adat Kebon Bukit, tatkala Pasangkepan Desa saha sampun kajantenang malarapan antuk lekita saking desania;
- (3) Sang sapisirawed saking Desa Adat Kebon Bukit, matinggal ka liwaring desa, wastu malih mawali ka Desa Adat Kebon Bukit :
  - ha. Yan sangkaning rahayu kalih saking palugrahan Prajuru Desa patinggale nguni, wenang mawali mipil ring Banjar Adat Kebon Bukit, nganutin sukerthan desa;
  - na. Yan sangkaning tan rahayu patinggale nguni, yogya katengahang babaose ka desa, mangda kabaosin antuk Prajuru Desa, manut pamutus pararem, prasida mipil pinaka krama desa Adat Kebon Bukit.

#### Pawos 6

Usan makrama desa ring Desa Adat Kebon Bukit, malarapan antuk :

- ha. Seda;
- na. Sangkaning pinunas ngaraga, saha polih palugrahan Prajuru Desa;
- ca. Tedah utawi tilar saking Agama Hindu;
- ra. Kasepekang saha kaheladang antuk desa.

#### Pawos 7

- (1) Swadharmaning krama desa :
  - ha. Krama Ngarep, yogya kenipaayah-ayahan, tata-turun nyumek, nyanggra saraja karyan desa, manut ungguan soang-soang.
  - na. Krama Sorpa, yogya nyanggra saraja karya ritatkala aci, sane katiwakang antuk desa manut dresta;

- ca. Krama Balu Lanang sane maduwe sentana istri miwah krama balu istri sane maduwe sentana lanang sane sampun napak wirang pateh sakadi krama ngarep;
  - ra. Krama Sasabu, yogya ngaturang panahub ka desa sanunggil ngawarsa, gung artha manut pararem;
  - ka. Krama Tamiu yogya ngaturang panahub ka desa ngamasa-masa, satunggil ngamargiangyadnya olih desa, gung artha manut pararem;
  - da. Tamiu tan sareng sapaalikramaning agama Hindu, nanging tan wenang piwal ring Awig-Awig, Pararem Desa miwah pamutus Pararem Desa, sane ngindikang tata pawongan kalih Palemahan;
  - ta. Krama desa samian yogya saturut ring daging Awig-Awig Desa, Pararem miwah pamutus Pararem Desa, ngutsahaang mangda kasidhan mapikolih sakadi patitis tatujon de sane kinucap ring ayun, tumus mamangguhang kajagadhitaning praja;
- (2) Phalapeksaning krama desa :
- ha. Krama desa samian yogya polih pasayuban wiadin paroban saking desa, saluiring wiawahara rania yogya kabaosang antuk Prajuru Desa manut tata titining wicara;
  - na. Krama desa samianpatut ngalaksanaang Panca-yadnya sajeroning Desa Adat Kebon Bukit, manut dresta;
  - ca. Krama desa sane sampun mipil, wenang polih babagian layuban aci-aci saluiripun, tuas-tuasan, miwah sane patut katiba ring krama desa;
  - ra. Mapuangkit inggih punika tan tedun maayahan, yogya saking panglokikan kalih palugrahan Prajuru Desa.

## **Palet 2**

### **Indik Tata Praja Desa Adat**

#### **Pawos 8**

- (1) Prajuru Desa Adat Kebon Bukit, luire :
- ha. Bandesa;
  - na. Pamadhen Bandesa;
  - ca. Panyarikan Desa;
  - ra. Juru Raksa;
  - ka. Juru Arah.
- (2) Sabha Desa Adat Kebon Bukit, luire:
- ha. Manggala sapisanan Angga;
  - na. Panyarikan sapisanan Angga;
  - ca. Angga
- (3) Kertha Desa Adat Kebon Bukit, luire:
- ha. Manggala sapisanan Angga;
  - na. Panyarikan sapisanan Angga;
  - ca. Angga

- (4) Banjar Adat luire:  
ha. Keliyang Banjar;  
na. Panyarikan;  
ca. Juru Raksa;

### Pawos 9

- (1) Sane wenang kaadegang wiadin kamanggehang dados Prajuru Desa luire :  
ha. Krama Ngarep sane matata turun cumek, mayahan saurah-arih ring Desa Adat Kebon Bukit;  
na. Tan cedangga, sakadi peceng, perot, cungh lan sapanunggilan ipun, sane katandangin kabakta saking wau embas;  
ca. Wikan mamaos kalih nyurat Aksara Bali utawi Latin;  
ra. Mabukti tan nahen malaksana corah.
- (2) Pidabdab ngadegang Prajuru Desa :  
ha. Paruman Desa ngawentenang saseliran, pangawit Paruman Desa matujuang sang pacang kaadegang dados Bandesa, yan kantos lintangan ring adiri sane katuju antuk Paruman Desa, yogya melarapan antuk nunas ica masrana antuk lekesan;  
na. Mungguing ngadegang Pamadhen Bandesa, Panyarikan, Juru Raksa, Juru Arah minakadi Patangan Desa saking panyudin Bandesa, sane kabriyukin antuk Paruman Desa;  
ca. Lamine dados Prajuru Desa wantah limang warsa saking dina pangadegane sajaba kapadgatakalan minakadi sangkaning wenten wiawahara;  
ra. Yan sampun naen madeg pinaka Prajuru Desa, dados kasudi malih;  
ka. Yan wenten sinalih tunggil piwal kalaning kasudi antuk Paruman Desa, sang piwal punika wenang katiwakin panglokika, yan tan manut paksania yogya kabaosin, yan jati tuhu paksania, Paruman Desa wenang nyudi sane siosan.

### Pawos 10

Swadharmaning Prajuru Desa :

- ha. Minabdabin desa, krama desa, pacang ngupadi kajagadhitan sakala niskala, maka darsana Awig-Awig Desa, Pararem Desa, pamutus Pararem Desa, nganutin uger-uger nagara lan sastra Agama Hindu;  
na. Ngarancana saluiring utsahan desa kaungkur, ngarancana saluiring sane nyandang pacang wangunang, sane patut ayum, manut lokika desa kala patra, sane mabuat, mangda kasidhan polih palugrahan Sang Amawarat;  
ca. Mamaosin saluiring wiawahara utawi wicara sane wetu sajeroning Desa Adat Kebon Bukit, niwakang tatimbang, utawi pamutus babaos sane yogya kaputusan sajeroning Desa Adat. Yan tan kasidhan kabaosan ring desa, Prajuru Desa mituduhang mangda ngaturang ring Sang Amawarat;

- ra Mriyaksa, nulingayang saparipolah keliang banjar, Pamangku-Pamangku Desa, pamangku kahyangan jagat, minakadi sane siosan sane wenten sajeroning wawengkon Desa Adat Kebon Bukit;
- ka Midabdabin saluiring pamargin aci-aci ring wawidangan Desa Adat Kebon Bukit, taler nulingaang krama indike ngalaksanaang Panca Yadnya;
- da Prajuru Desa wenang nyanggra saluiring pituduh, minakadi saraja karya saking Sang Amawarat, werat utawi ringan, sane yoga katiwak ring Desa Adat.
- ta Nyanggra saraja karya ring pura Kahyangan desa sane kaempon antuk Desa Adat Kebon Bukit;
- sa Pinaka duta pacang matemuang babaos ring sang sapisira ugi, yan pandidikan punika kapineh nyandang pacang marginin;
- wa Wenang ngawangunang Pacalang Desa, sane patut nulinga katreptian sawawengkon Desa Adat Kebon Bukit. Mungguing ngadegang, swadharma minakadi phalapeksa Pacalang mungguh sajeroning Pararem Desa;
- la Wenang ngawangunang sekaa-sekaa siosan, sane pacang ngaremba swadharma Prajuru Desa sane kabuatang;
- ma Prajuru Desa kaadegang majalaran antuk pawintenan sane kalaksanaang ring Pura Desa Adat Kebon Bukit.

#### Pawos 11

- (1) Sane dados kaadegang wiadin kamanggehang maka Sabha Desa Adat Kebon Bukit, inggih punika utusan saking banjar adat, sane wikan ring adat saha Awig-Awig Desa, akeh ipun mangda gasal;
- (2) Sabha Desa kaadegang olih Prajuru Desa Adat, mawaneng 5 (limang) warsa;
- (3) Swadharmaning Sabha Desa, sane madue wawenang ngaturang dharma tatimbang ring Prajuru Desa Adat;

#### Pawos 12

- (1) Sane dados kaadegang wiadin kamanggehang maka Kertha Desa, luire:
  - ha. Prajuru Desa Adat Kebon Bukit, kamanggala antuk Bandesa Adat;
  - na. Utusan saking banjar adat sane wikan ring adat saha Awig-Awig Desa;
  - ca. Sapisira ugi krama desa ngarep sane kapineh patut manut pararem.
- (2) Kertha Desa kaadegang olih Prajuru Desa Adat, mawaneng 5 (limang) warsa, saha akeh ipun mangda gasal;
- (3) Swadharmaning Kertha Desa:
  - ha. Madue wawenang nerima, nureksa miwah maosin sahananing wicara sane metu ring desa adat;
  - na. Dasar muputang wicara malarapan antuk Awig-Awig mingsinggihang para sparo sarpana ya;
  - ca. Yan tan prasida puput wicarane, Kertha Desa patut ngaturang ring Majelis Desa Adat (MDA) manut papalihan.

### **Pawos 13**

Phalapeksa Prajuru Desa, Sabha Desa miwah Kertha Desa:

- ha. Luput papeson minakadi raramon rikala ngaci manut pararem;
- na. Wenang polih tuas-tuasan kalih tanding;
- ca. Wenang polih pioli-oli saking gunakayan desa manut pararem;
- ra. Yan sajeroning kari madeg dados Prajuru Desa, Sabha Desa miwah Kertha Desararis seda polih pangelad saking desa;
- ka. Yan sampun puput pangadege, patut kawentenang upacara pangelad saking desa manut pararem.

### **Pawos 14**

Prajuru Desa, Sabha Desa miwah Kertha Desa kagentosin utawi usan, majalaran antuk :

- ha. Seda;
- na. Mabukti sungkan rahat tur suwe kantos lintang awarsa;
- ca. Mapinunas sangkaning rahayu, saha polih lugraha saking Paruman Desa;
- ra. Tutug sengker pangadege;
- ka. Malarapan antuk iwang, manut pararem.

### **Palet 3**

#### **Indik Sangkepan miwah Paruman**

### **Pawos 15**

Mungguing Sangkepan lan Paruman Desa, kadi ring sor puniki :

- ha. Sangkepan Prajuru Desa magenah ring Bale Pasangkepan Desa Adat Kebon Bukit wiadin genah siosan padgatakala, sadurung sangkepan desa;
- na. Sane patut nedunin sangkepan Prajuru Desa punika wantah, Prajuru Desa Adat, Kertha Desa, Sabha Desa, Prajuru Banjar adat, lan sang sapasira ugi sane kabuatang antuk Prajuru Desa;
- ca. Maka manggalaning mababaosan sajeroning sangkepan, paruman, manggeh Bandesa, wiadin sinalih tunggil Prajuru Desa saking palugrahan Bandesa;
- ra. Pasangkepan Desa kawentenang satunggil Budha Umanis ngasasih, katedunin antuk krama Desa Ngarep makasami;
- ka. Paruman Desa dados kawentenang padgatakala manut werat wira sane sane pacang kabaosang mawit saking pamutus Prajuru Desa sajeroning Paruman Desa;
- da. Banjar Adat, Pamaksan Pura, Sekaa-Sekaa siosan, sane wenten sajeroning Desa Adat Kebon Bukit tan kalugra ngawentenang sangkepan kalaning dina pasangkepan Desa, yan mamurug, yogya sangkepan sekaa inucap kawangdeang.

## Pawos 16

Tata kramaning Pasangkepan lan Paruman :

- ha. Saya patut makta pasayaan, tegepeteh-eteñ pasayaan, manut pagilih urak;
- na. Yan kapatut pacang nganggen babanten sakabuatan, Prajuru Desa, yogya mituduhang mangda cumawis, saha nyukseraang padagangan ring sang kapituduh makarya babanten;
- ca. Saya Desa wenang nepak kulkul, yan sampun carem kramane ngararis aturan punika kaantebang, mabriuk muspa sareng sami, ngraris mababaosan kantos puput;
- ra. Babaosan sajeroning sangkepan lan paruman, ugi ngupadi karahayuan jagat, minakadi ngarajegang kamuruban Sang Hyang Widhi, majalaran bhawa laksana manut dresta;
- ka. Yan wenten sinalih tunggil ngatengahang babaos sajeroning sangkepan lan paruman, yogya kadamyakang, yan nyandang baosin, yogya rinaosan, yan tan nyandang baosin, antukang ring sang ngamimitin;
- da. Pamutus babaos, wiadin pararem sajeroning sangkepan lan paruman malarapan antuk briuk sapanggul anut sang nyangkepin, yogya kalekitaang lan kalaksanaang;
- ta. Prade tan puput babaose sajeroning sangkepan kantos ping tiga sangkepane, patut katengahang sajeroning paruman, pamutus babaos sajeroning paruman pinaka pamutus pamekas;
- sa. Sangkepan punika kabaos puput, yan sampun pamutus babaose kadamyakang, raris nimbalang pagilih saya, saha sampun mabacak.

## Palet 4

### Indik Kulkul

## Pawos 17

- (1) Sajeroning wawengkon desa, wenten babacakan kulkul, kadi ring sor:
  - ha. Patedunan : Atulud;
  - na. Panca Yadnya : Ngoncang;
  - ca. Kasedayan : Duang tulud
  - ra. Panca bhaya : Kulkul bulus
  - ka. Kulkul pangandeg wiadin wangde : tigang kelentungan.
- (2) Mungguing suaran kulkul punika mangda mabhina-bhinayan sawiji soang, manut sor singgih;
- (3) Nepak kulkul manut Tri Brata Sandhi : dharma, sima, laksana, tegesipun :
  - ha. Dharma sandhi : suaran kulkul maka cihna wiadin tatenger upacara agama wiadin yadnya;
  - na. Sima : suaran kulkul maka cihna wiadin tatenger Panca bhaya;
  - ca. Laksana : suaran kulkul maka cihna wiadin tatenger patedunan.
- (4) Ungguan nepak kulkul :
  - ha. Yan nepak kulkul tatenger patedunan, ugi kulkul sane kadue antuk sekaa, katepak antuk sang patut ngulkulang;

- na. Yan nepak kulkul tatenger Panca bhaya, wenang saungguan-ungguan, asang nampek genahe, wenang katepak antuk sang rihinan manggihin bhaya punika minakadi saking pituduh sang ngawiwenangang;
- ca. Yan nepak kulkul tatenger Panca Yadnya, wenang kulkul sane wenten ring soang-soang genah upacarane;
- ra. Yan kalaning ngalungaang bhatara, mendak bhatara, Bhatara turun kabeh, kalaning pacaruan desa, sami kulkule dados suarayang, tatepakan manut dresta;
- ka. Yan wenten mamurug nepak kulkul tan manut dresta yoga kabaosin antuk Prajuru Desa katiwakan panglokika saha pamidandha manut pararem.

### Palet 5

#### Indik Duen Desa

#### Pawos 18

Sane kadue antuk Desa, luire :

ha. Kahyangan Desa :

- 1) Pura Desa;
- 2) Pura Puseh;
- 3) Pura Dalem.
- 4) Pura Ulun Suwi;
- 5) Pura Catus Pata;
- 6) Palinggih Melanting;
- 7) Palinggih Prajapati;
- 8) Palinggih Pangulun Setra;

na. Beji, Setra;

ca. Palemahan sane kaanggen margi lan rurung;

ra. Bale Banjar;

ka. Tanah Pakarangan Desa;

da. Pralinggan Bhatara;

ta. Saluiring usaha sane kadue antuk desa manut pararem.

#### Pawos 19

Pilih-olih desa, luire :

- (1) Urunan, panahub lan pakenin-kenin pakaryan krama desa;
- (2) Aturan lan dana punia;
- (3) Paican saking Sang Amawarat;
- (4) pilih-olih saking saluiring usaha sane kadue antuk Desa.



**Palet 6**  
**Indik Laluputan**  
**Pawos 20**

- (1) Luput mapiteges nenten keni papeson.
- (2) Sane luput papeson, luire :
  - ha. Prajuru Desa;
  - na. Kertha Desa;
  - ca. Sabha Desa;
  - ra. Pamangku Desa;
  - ka. Pamangku Kahyangan;
  - da. Sang sapisira ugi sane kapineh antuk desa, manut pararem.

**Palet 7**  
**Indik Dedosan**  
**Pawos 21**

Dedosan patedunan, sangkepan, tedun makarya miwah sane siosan, nganutang sukertha soang-soang, luire :

- ha. Yan desa madue patedunane, yogya nganggen sukerthan Desa, sane kagaduh antuk desa, dedosan ngaranjing ka desa;
- na. Yan babanjaran madue patedunane, yogya nganggen sukerthan banjar soang-soang sane sampun kagaduh antuk banjar punika. Dadosan ngaranjing ka banjar;
- ca. Yan subak madue patedunane, yogya nganggen uger sukerthan subak sane sampun kagaduh antuk subak soang-soang, dedosane ngaranjing ka subak;
- ra. Yan sekaa-sekaa madue patedunane, yogya nganggen uger sekaa soang-soang, dedosan ngaranjing ka sekaa;
- ka. Yan wenten krama tan tinut ring tatepasan landedosan punika, wenang babaose katengahang ka desa, Prajuru Desa yogya mamaosin saha niwakang pamutus;
- da. Agung alit dedosan manut pararem.

**Palet 8**  
**Indik Bhaya**  
**Pawos 22**

- (1) Sane kinucap Panca-bhaya, luih ipun : jiwa bhaya, aghni bhaya, toya bhaya, artha bhaya lan bayu bhaya;
- (2) Saluiring bhaya wenang geperang antuk suaran kulkul;
- (3) Sang sapisira ugi krama desa sane manggihin, wiadin uning ring panangkaning bhaya, ring kang katiben bhaya, wenang ngeperang nepak kulkul manut indik kakulkulan bhaya, raris damyakang ring wadesa;

- (4) Rikala wenten suaran kulkul bulus tatenger bhaya, krama desa patut yatna, sayaga, saha sregep ngamong prabot wiadin gagaman soang-soang;
- (5) Yan sampun tatas ring bhaya punika, krama desa patut matatungulung nambakin bhaya punika, manut ungguan, kalih manut patuduh sang yogya ngawiwenangang;
- (6) Sang sapisira ugi tan kawasa majajabur utawi majajarah, rikalaning desa lankrama desa katiben bhaya. Yan wenten kacirenan mamurug, yogya katengahang ka desa, wiadin katur ring Sang Amawarat;
- (7) Yan pinganan bhaya punika sampun kapineh nahnah, tan pacang nyangkalen wenang kacihnaang antuk suaran kulkul lambat atuludan, wiadin pasiar saking Sang Amawarat.

#### Palet 9

### Indik Rarampagan lan Kekeran Desa

#### Pawos 23

- (1) Tan kalugra nebtob, ngarebah, wit-witan saluir ipun, ring palasan, pategalan, abing, tangkid, alas miwah genah siosan sane kakeker antuk desa, yan wenten sinalih tunggil mamurug, katiwakan dandha manut lokika, manut pararem, tur taru sane karebah mantuk ka desa sasampun polih panugrahan saking Sang Amawarat;
- (2) Saluiring wit-witan sane sampun kacirenan wiadin kasawenin antuk desa pacang mangge mapawangun ring desa, pradene punika karebah antuk sang madue, yogya sang madue katiwakin dandha, manut lokika, manut pararem, taru wiadin wit-witan sane karebah mantuk ka desa, desa patut naur taru manut pangarga;
- (3) Sane wenang rampag, keker manut pidabdab ngarampag, ngeker mungguh sajeroning pararem.

#### Palet 10

### Indik Panyanggran Banjar utawi Krama Desa

#### Pawos 24

- (1) Saraja karyan desa kasanggra antuk krama desa kaunadikaang antuk Prajuru Desa;
- (2) Saraja karyan banjar kasanggra antuk krama banjar, soang-soang kaunadikaang antuk keliang banjar;
- (3) Yan wenten krama desa ngawangun yadnya suka duka, kengin nunas panyanggran desa.

**CATHURTAS SARGGAH  
SUKERTA TATA AGAMA**

**Palet 1**

**Indik Dewa Yadnya**

**Kaping 1**

**Indik Kahyangan**

**Pawos 25**

- (1) Pura sane kadue antuk desa, sane kaempon antuk desa, indik pangaci-aci manut dresta, gagaduhan kalih pasuaran desa;
- (2) Pura kahyangan sane siosan sakadi kinucap ring ayun, papayon kalih pangaci-aci kaemponin antuk krama sane nyungsung Bhatara ring pura kahyangan punika soang-soang;
- (3) Mungguing beji, papayon kalih pangaci-acinia kaemponin antuk krama desa, yan wenten beji tan kaaci-acinin, toyan ipun tan yogya angge sadana sarwa suci;
- (4) Yan wenten Pura Kahyangan sinalih tunggil reneng pangaci-acinia, kantos kadasa warsan, yogya Prajuru Desa mamaosin, maritetes, ngutsahaang mangda kasidhan mawali kadi jatimula. Nanging prade tan kasidhan, majalaran antuk pamutus Paruman Desa, prasadha desa ngawangunang pangupakara mralina pura punika, mangda tan karanjangan kaumahin antuk Ki Bhuta Kubandha;
- (5) Yan wenten pura magenah ring Desa Adat Kebon Bukit, panyungsung miwah pangempon ipun sami magenah ring liwaring desa, yogya pangempon pura punika ngaturang punia sinunggil pacaruan Tilem Kasanga ring desa ngamasa-masa, napkala pangaci-aci ugi mangda masadok ring Prajuru Desa;

**Kaping 2**

**Indik Pangaci-aci**

**Pawos 26**

- (1) Soang-soang pura madue gagaduhan, pinaka uger pangaci-aci, miwah babanten;
- (2) sane yogya muput aci-aci punika sulinggih sane katuur antuk krama pura soang-soang, utawikaanteb antuk pamangku ring pura inucap manut kawenangannia;
- (3) Yan wenten pura sane kaempon antuk desa sane durung madue Pamangku, utawi pamangkune kapialang, dados nuur sinalih tunggil Pamangku Kahyangan Desa;
- (4) Pamangku pura punika wantah pamangku Pura Desa, Pura Puseh, Pura Dalem, minakadi Pamangku Kahyangan sane wenten sajeroning Desa;
- (5) Pamangku Kahyangan Desa wenang nganteb pangodal ring pura kahyangan siosan sane wenten ring wawidangan Desa Adat Kebon Bukit. Yening Pamangku Kahyangan desa kapialang dados nyarad Bendesa;

**Pawos 27**

- (1) Indik pangaci-aci Pura Pamrajan, Paibon, Dadia punika kaamongin antuk krama pangempon pura punika soang-soang;
- (2) Ritatkala usabha ring Pura Kahyangan Tiga, Ida Bhatara katuran malasti, masucian ka sagara utawi ka Pasucian manut dresta.

**Pawos 28**

- (1) Aci-aci, piodalan, usabha, pasegeh ring pura kahyangan desa dudonania manut dresta;
- (2) Indik rahina pengaci-aci, piodalan, usabha, pasegeh ring pura kahyangan desa luire:
  - ha. Pura Puseh lan Bale Agung Desa Adat Kebon Bukit, usabha sasor ipun nigang warsakala dina Purnama Kasa;
  - na. Pura Dalem miwah Prajapati, usabha sasor ipun nigang warsa, kala dina Tilem Kadasa;
  - ca. Sajaba ngusaba, pangaci-aci siosan manut dresta, luire :
    - 1) Ring rahina Galungan krama desa ngamargiang upacara Galungan;
    - 2) Ring rahinan Kuningan, ngamargiang upacara Kuningan;
- (3) Padagingan pengaci-aci saking:
  - ha. Piturunan lan wawijilan krama desa;
  - na. Pioli-oli pagunakayan krama desa;
  - ca. Aturan-aturan krama sangkaning suka nirmala;
  - ra. Pioli-oli saking usaha desa sane patut.
- (4) Rikala kabrebehan jagate, kageringan, katiben Panca bhaya, pinganan tan mersidhayang ngaturang aci kadi patute, yogya Prajuru Desa miwah Pamangku Desa, ngaturang piuning ring Bhatara, masadhana babanten padhatengan, pacanangan maka cihna tan pegataci-acine. Ri wus mawali degdeg jagate, patut ngawangunang upacara Bhatara Turun Kabeh, masasirih makakobok ka sagara giri;
- (5) Yan rikala mahayu, ngayum papayon, ring pura kahyangan, pinganan tan puput kala dinaning piodalan, pangacine wenang rangkadang, nanging padhatengan, pacanangan, tan dados pegatang. Ri wus puput masasapuh saluire, malih mawali kadi nguni.

**Kaping 3**

**Indik Sukertha Pura Kahyangan**

**Pawos 29**

- (1) Rikalaning ngaturang aci-aci pamangku ring kahyangan punika sane dados munggah tedhun ring palinggih-palinggih pura kahyangan inucap, taler kasarengin antuk Pamangku lan krama tiyosan sane polih lugraha saking pamangkupura inucap utawi lugraha Prajuru Desa;

- (2) Tan kalugra masumpah, macoran, sajeroning pura kahyangan, sajaba sangkaning wicaran pura inucap, taler saking pabuat krama pura, utawi krama desa sane ngempon pura punika, yening mamurug kapidanda manut pararem;
- (3) Tan kalugra wak capala, hasta capala, pada capala, miwah sapanunggilan ipun, sajeroning pura kahyangan. Yan macihna wenten mamurug, wenten raris ngatengahang ka desa yoga kapidandha manut pararem;
- (4) Tan kalugra malaksana kantos ngawetuang biota ring pura kahyangan. Yan wenten mamurug sang kapineh sampun napak wirang, yoga kapidandha manut pararem;
- (5) Sang sapisira ugi kacuntakan, saluiring cuntaka, yan durung mabersih, tan kalugra ngaranjing ka pura kahyangan. Yan katenger wenten mamurug, yoga kapidandha marisudha kahyangan punika;
- (6) Sedahan ngengengan miwah sapanunggilan ipun tan kalugra maseha ring pura. Yan wenten mamurug, yoga kapidandha manut pararem;
- (7) Tan kalugra ngawentenang klecan, jajuden, sajeroning suter pura kahyangan. Yan wenten mamurug, sang ngalaksanaang katur ring Sang Amawarat, tur klecan utawi jajuden punika kawangdeang;
- (8) Tan kalugra makta saluiring sane kasinanggih tan suci ka jeroning suter utawi panyenger pura kahyangan. Yan wenten mamurug, yoga sang mamurug marisudha pura punika;
- (9) Sang sapisira ugi rikalaning makemit ring pura kahyangan, merem, tan kalugra madukan lanang istri, sajaba anak sane kapineh kari alit. Yan mamurug kapidandha manut pararem;
- (10) Ring jeroan pura kahyangan tan wenang kanggen sajaba ngalaksanaang upakara upacara yadnya Agama Hindu. Yan mamurug kapidandha manut pararem;
- (11) Sang sapisira ugi, katedunan utawi kapangluh sajeroning pura kahyangan sawawengkon Desa Adat Kebon Bukit, mababaos minangkenang pangandikan Ida Ratu Sasuhunan utaw iBhatara, ring gelis tunasang tirtha laluputan mangda gelis hudep. Prade sasampun kaketisin tirtha, kanton ngatemel masera-masero, ngawetuang sumandea kayun kramane, irika patut pintonin, ambilang toya apane, celebang limannyane makakalih. Yan mabukti tan belus, nyandang gega pangandikan Bhatara. Yan prade belus, tan nyandang gega, gelisang gingsirang mangda doh saking pura punika.

#### Kaping 4

#### Indik Pamangku

#### Pawos 30

- (1) Ring soang-soang Pura Kahyangan ugi madue pamangku.
- (2) sane tan wenang kaadegang dados pamangku, luire :
  - ha. Cedanggaluire : peceng, perot, cungh lan sapanunggilan ipun;
  - na. Mabukti sungkan rahat;

- ca. Mabukti nahen ngarug sasana, minakadi malaksana corah.
- (3) Pidabdab ngadegang pamangku inggih punika, saking saserodan, sangkaning kajujuh saha sampun kabriukin krama desa, yan lintangan ring adiri panyudian malarapan antuk lekesan;
  - (4) Sang sapasira ugi pinaka jan banggul, pamangku ring Pura Kahyangan Desa miwah pura siosan sane wenten ring sajeroning desa, mangda pageh ngamel kalih ngalaksanaang sasanan miwah swadharmaning Pamangku;
  - (5) Sang sapasira ugi krama desa sane kaadegang pamangku, yan kari alaki rabi yogya lanang istri mawinten;
  - (6) Sang kasudi pacang kanggen pamangku, patut mawinten ring pura genahe dados pamangku, mungguing prabea kasandangin antuk krama pura soang-soang, pamangku desa kasandangin antuk desa;
  - (7) Pamangku patut madue hamongan pura soang-soang, yan tan madue hamongan pura, tan kalugra ngantebang babanten ring pura-pura saluire;
  - (8) Yan wenten Pamangku katekan pati, yogya tiniwaken. Patut polih patulung prabea atiwa-tiwa, yan pamangku desapolih patulung saking Desa, yan pamangku siosan, saking krama pura soang-soang, agung alit patulunge nganutin pamutus babaos sajeroning paruman kala punika;
  - (9) Yan pamangku wus tiniwaken, patut kakaryanang pangelad wiadin pamegat antuk krama desa utawi krama pura inucap. Yan pamangku punika kari rajeg ngamong swadharmaning pamangku kantos hantaka;
  - (10) Tuas-tuasan Pamangku mungguh sajeroning gagaduhan, Pararem Desa ring pura soang-soang, taler nganutin dresta;
  - (11) Pamangku kagentosin majalaran antuk :
    - ha. Seda;
    - na. Mapinunas mararyan, saking patut pinunase, tan kantun ngalaksanaang dharmaning pamangku;
    - ca. Saking patut pinunase, majalaran antuk lingsir, sampun tan mampuh, sungkan rahat tan kengin waras, kajadaang antuk krama pura, wiadin desa;
    - ra. Sangkaning kausanang, majalaran mamurug sasanan pamangku.

## **Kaping 5**

### **Indik Cuntaka lan Sosot**

#### **Pawos 31**

- (1) Sang sapasira ugi sane kahanan cuntaka, tan wenang ngeranjing ka pura kahyangan, ka panyucian kalaning nyuci gening, minakadi genah saluiring genah sane kinucap suci pingit, Sakewanten yening cuntaka sangkaning kapatian dados ngeranjing ka Pura Dalem Panguluning Setra miwah Prajapati. Yening mamurug kapidanda manut pararem;

- (2) Sapasira ugi tan wenang ngaryaning saji saluiring saji sane pacang katur ka Sanggar Tawang, sakadi suci gening. Sakewanten yening cuntaka sangkaning kapatian dados ngaryaning banten sane pacang katur ka Prajapati, Dalem panguluning setra;
- (3) Sane kinucap cuntaka, luire :
  - ha. Anak istrikaning ngrajasuala, suen cuntakane, saking ngawit ngrajasuala, kantos nyat, macihna sampun malukat;
  - na. Sang alakirabi, suwene cuntaka, ngawit saking rahina pangantenane, wiadin rahina marangkate, kantos puput mabyakawon utawi puput pawiwahan;
  - ca. Rama rena cuntaka sangkaning ngembasang oka, sane lanang cuntaka, saking embas anake alit, kantos kepus odelnyane saha masasuuk, raris malukat, sane istri pinaka rena, cuntaka 42 (petang dasa kalih) dina saking wau embas rarene;
  - ra. Yan anak istri cuntaka sangkaning karuron, pateh ring cuntaka ngembasang oka, lanange cuntaka tigung rahina, saha sampun malukat.
- (4) Cuntaka malarapan antuk kasedayan utawi kapatian :
  - ha. Yan wenten anak alit durung kepus odel raris seda, rama rarene cuntaka, sane lanang 3 (tigung) dina, sane istri 42 (petang dasa kalih) dina, saha sampun malukat;
  - na. Yan sang ngarepin, minakadi sang magenah sajeroning karang pomahan sang seda, suen cuntakane, saking wauseda kantos puput panglemek karyane, punapike mapendem, luh yan atiwa-tiwa. Macihnaang punah cuntakane antuk marerebu, malukat;
  - ca. Sang polih ninjo, ngarap sawa, ngamel saha ngarembat saeteh-eteheh pula-palining sawa, nyembah sawa, mangan paridan sawa, punika taler kabaoscuntaka, punah cuntakane macihnaang antuk malukat;
  - ra. Rikalaning desa ngamargiang upacara yadnya, pet prade wenten sinalih tunggil krama kalayu sekaran, patut kamargiang sebel karang ngawit saking nanceb tataring kantos karya masineb. Wawanengan sebel karang amung ring sang magenah sajeroning karang sane kacuntakan. Yan pacang ngamargiang sebel karang, patut mendhem makingsan kalaning wengi, tan polih panyanggran desa, sajabasang tan kapatut dados pendhem, punika maraksa sajeroning karang pomahan.
- (5) Anak wetu saking semara dudu utawi tan pawidhi widhana pawiwahan punika taler cuntaka. Suwene cuntaka, salamine durung kaupacarain, wiadin nuduk ngangkenin pianak, utawi nganggen dadaman;
- (6) Cuntaka sane mabukti madue panyungkan sane tan sidha waras, minakadi sungkan hila, buduh, ngawijilang reged saking silit, bhaga, purus, tan henap mameres, berung borok taunan mabanyeh, miwah saluir punika. Suwene cuntaka, salami durung waras;
- (7) Cuntaka sangkaning cedangga manut panglokikan Prajuru Desa punika tan kawenang napak Palemahan panyucian genah nyuci gening;

- (8) Yan wenten krama cuntaka antuk ngeraksa sawa wiadin layon, mapakayun ngrauhing karya ayu atma wedana, minakadi mabhakti ring sang wenang bhaktinin dados, nanging tan wenang ngarap, ngarembat, nyuwun, ngamel saupakarining puspa lingga;
- (9) Yan wenten krama desa durung tutug cuntaka kadi ucaping arep, mamurug larangan, yan wenten ngatengahang ka desa, Prajuru Desa niwakang pamidandha, yogya sang mamurug marisudha sakabuatan manut panglokika;
- (10) Yan wenten anak istri, sangkaning tan meha ngrajasuala sasampun ring pura, wiadin ring genah laranganesiosan, raris kacirenan, wenang ya tiwakin dandha tanmeha, yogya marisudha genah punika, katulung antuk pangempon pura inucap;
- (11) Yan wenten krama desa, kacuntakan antuk ngeraksa sawa, wiadin layon, napkala pagilih pagantosan babanjaran ngaci-aci ring sinalih tunggil kahyangan desa, pacaruan ring desa, sadurung tutug sengker cuntakania, wenang tan tedhun maayahan, tan dinosan, yan wenten pasadok sang cuntaka ring Prajuru Desa;
- (12) Yan cuntakagama gamana utawinyolong semara Prajuru Desanyantosang pamutus Sang Amawarat. Yan sampunwenten pamutus saking Sang Amawarat ring Desa katiwakan pamidandha manut pararem;
- (13) Cuntaka sangkaning mabukti salah timpal, cuntaka ragan sang malaksana, muah Desa pagenahania. Tutug cuntakania yan sampun sang malaksana mrayascita panyangaskara raga, genah malaksana lan mrayascita desa. Buron sane kaajak masanggama kararung;
- (14) Anak luh beling tan kapariangken, suwenecuntaka kantos wenten pangupakara panyangaskara kulawisudha, anake beling mawidhi widana pawiwahan masanding keris pinaka linggan sang kadalih kaupasaksi antuk Prajuru Desa.

### Pawos 32

(1) Indik Sosot :

- ha. Sapisira ugi pacang naur sosot wiadin punagi, patut nganggen pamegat sot rikalaning dina piodalan Bhatara, 10 (ngadasa) dinaang aci, patut masadok ring pamangku pura, yan ring Kahyangan Desa panaurane masadok ring Prajuru Desa minakadi Pamangku Pura inucap. Panauran punagi punika, wau kalaksanayang yan sampun puput pangodale;
- na. Sapisira ugi naur sasangi pacang ngaturang pangodal, ugi mangda ring dina pagantosan piodalane. Sang naur punagi, wenang nunas kanti patulung karya ring krama utawi pangempon kahyangan. Sang naur sasangi nyukserahang daging cumek saprabeaning pangodal ka desa;
- ca. Sapisira uginaur sasangi maturan suaran tangguran saluiring tatabuhan, sasolahan, minakadi saluir ipun, mungguing prabea punika sami kaangganin antuk sang masasangi;
- ra. Saluiring aturan sosot utawi sasangi sane ngeranjing ka desa kepah manut pararem.



- (2) Aturan :  
Sang sapasira ugi ngaturang punia, punika sami patut kaunadikaang antuk Prajuru Desa lan Pura soang-soang, mangda kasidhan mapuara ayu. Aturan punika kaanggubang sajeroning lekita;
- (3) Sasarin Canang :  
Sasampun puput pangaci-aci puja waline, sasarin canang punika kapupulang saha kawilangin. Kaunadikaang antuk Pamangku, Prajuru Desa lan Prajuru Pura, indik tatiwak lan pamargin ipun manut pararem.

**Palet 2**

**Indik Resi Yadnya**

**Pawos 33**

- (1) Krama desa, yogya ngawerdhiang kapradnyanan, kautamaan Sang Hyang Aji Sastra, asewaka nunas pawarah ring sang maraga widagdha pradnyan, pingajeng ring sang kasinanggeh guru loka;
- (2) Prajuru Desa, Kelihang Banjar, ngutsahayang kawerdhian kamuruban kautamaan Sang Hyang Aji Sastra, ngawentenang paruman, parembugan, pinaka genah krama desa mamanggubang pawarah-warrah ayu;
- (3) Kalaning dewasa ayu, wenang desa matirtha yatra, wenang desa ngaturang punia miwah resi bhojana ring Ida Sulinggih. Talerkalaning karya utama ring desa, saluiring karya sane kaputus antuk Ida Sulinggih patut ngaturang punia. Asapunika taler ring sang mapitulung patut maweh dana;
- (4) Sang sapasira ugi krama desa yan mapakayun pacang mapodgala, taler mangda wenten pasadok ring Prajuru Desa, sajaba patut polih palugrahan saking Sang Amawarat;
- (5) Prajuru Desa, mamatut pisan, yan krama de sane mapunia ring sang pradnyan, ring sang widagdha, ring sang satata ngarajegang dharma, pingajeng ring Ida Sulinggih pasuryannyane soang-soang.

**Palet 3**

**Indik Pitra Yadnya**

**Pawos 34**

- (1) Pamargi ngupakara sawa, ugi manut sastra Agama Hindu. Wenten makudang-kudang soroh, sakadi ring sor puniki :
- ha. Mapendhem ring perthiwi;
  - na. Makingsan ring ghni;
  - ca. Atiwa-tiwa, palebon, utawi ngaben;
  - ra. Yan rare durung makupak untu wus kepus odel antaka, wenang ngangge pangentas bangbang masadhana kelungah kelapa gading, ngaran ngalungah, tan wenang kaabenang;

- ka. Yan rare durung kepus odel hantaka, pamali ngaran, wenang pendhem juga. Pangupakaramia ngalangkir, masarana ganten utawi adem paican Ida Sulinggih;
- (2) Sang sapasira ugi krama desa, tan kawasa makta sawa ka desa, yan sawa ika sampun keni pangupakara sawa. Yan wenten mamurug, yogya katiwakan dandha, mrayascita marisudha desa;
- (3) Saluiring upacara atiwa-tiwa, palebon, utawi ngaben, yan ngeseng ring setraugi kawenangania, tan wenang ring pakarangan desa, sajaba sang maraga sulinggih. Yan wenten mamurug, wenangdandhamarisudha desa. Krama desa sang atatulung, dandha artha manut pararem;
- (4) Yan wenten krama desa nyekeh sawa, macamana, mabersih, tan kalugra lintangan ring 42 (petang dasa kalih) dina ngawit saking dina sedane. Yogya murnama, tilem miwah saluir upacara rarahinan. Yan kalaning angurung sawa, sajeroning desa kawangunang karya agung kantos nyuci gening, luire matabuh gentuh, Bhatara turun kabeh, karya agung ring Besakih, yogya tumpang salune tedunang saking balene, genahang ring natah umahe, saking bhatara kodhal kantos Ida masineb;
- (5) Tan wenang nyekeh sawa yan tan marencana ngaben, macamana, mabersih, lintangan ring 12 (roras) dina, ngawit saking dinane seda. Yan wenten mamurug, dandha gung artha manut pararem;
- (6) Tan wenang atiwa-tiwa, ri kala pangaci-acin desa, mawit saking 11 (nyolas)dinaang aci-aci kantos Bhatara puput masineb, yan mamurug kapidanda manut pararem;
- (7) Yan wenten krama desa mendhem sawa kalaning dina larangan, kawasa, nanging ugi masawen, durung magagumuk, laku kingsan ngaran sasampun polih lugraha saking Prajuru Desa;
- (8) Yan makingsan ring ghni, sawa gineseng, asti inanyut, manut dresta. Yogya nganggen tirtha pabersihan. Mungguing dewasa, sator ipun dewa sane dados marginin mendem sawa;
- (9) Tan dados nginepang miwah ngawangdeang bangbang ring setra, yan wenten mamurug kapidandha manut pararem;
- (10) Padewasan :
- ha. Padewasan mendhem ring perthiwi miwah makingsan ring gni, wenang katiwakang antuk Bandesa;
- na. Padewasan atiwa-tiwa, katiwakang antuk sulinggih sane pacang muput, yogya sampun kapatut antuk Bandesa;
- ca. Indik larangan ngupakara sawa, sajaba ngunggahang ka tumpang salu, sane kamanggehang sajeroning Desa, luire : Purnama, Tilem, Prewani, Kajeng Kliwon, kala gotongan, semut sadulur, ingkel wong, lan pasah. Yan wenten mamurug, kapidandha manut pararem;
- ra. Tan wenang ngagah ngulung, teges ipun, sajeroning setra tunggil, tan dados mresihin sawa, nuju dina pangutangan yan ring setra punika wenten

- ngalaksanaang pangabenan. Yan wenten mamurug ~~kapidandha~~ manut pararem;
- ka. Yan pacang mendhem sawa, tan kalugra ngunjalin yan genah sawa punika dados akarang pomahan, yan mamurug, ~~kapidandha manut pararem~~;
- da. Upacara atiwa-tiwa dadakan dados kamargiang sajeroning 12 (roras) rahina, sajawaning wenten larangan desa;
- (11) Tan dados nguuk utawi ngebet sawa sadina-dina, teges ipun, sajeroning setra tunggil, yan wenten ngaben lintangan ring adiri, nyawa prateka, nyawa pranawa, sang pacang nyawa pranawa patut nguuk sawa sinarengan ring sang pacang mrateka mabersih ring setra, yan wenten mamurug kapidandha manut pararem;
- (12) Tan kalugra ngaben, sadurung puput panglemek, masasapuh ring setra sang makarya ngaben riinan, yan wenten mamurug kapidandha manut pararem;
- (13) Yan wentensawa tan kapariangken ring desa, hingaranan bedagan desa, ugi kasukseraang majeng ring Sang Amawarat;
- (14) Yan sawa sangkaning salah pati, angulah pati, desa tan ngalarangin, yan sawa punika tiniwaken pramangkin. Sara ledang sang madue, minakadi Ida Sang Sulinggih sane pacang muput;
- (15) Yan wenten sinalih tunggil sawa, genahe seda wiadin padem, sajabaning karang pomahan, luire : ring tegal, pura, pasar, banjar, sekolah, minakadi genah siosan dudu karang pomahan, yogya sang madue wirange mrayascita marisudha genah punika. Yan sawa tan kapariangkenan, genah punika patut kaparisudha kaprayascita antuk sang madue emponan;

#### **Pawos 35**

Indik angkatma wedana :

- ha. Sang sapisira ugi krama desa, yan kalaning angkatma wedhana, luire : ngaroras, patileman, baligya, tan wenang ngawangunang payadnyan, petak, ring Palemahan pura Kahyangan desa, minakadi kahyangan siosan;
- na. Sang sapisira ugi wus ngawangun karya angkatma wedhana, yogya karang payadnyan ika kapralina, sakasep ipun 42 (petang dasa kalih) dina saking dina karyane.

#### **Palet 4**

#### **Indik ManusaYadnya**

#### **Pawos 36**

- (1) Sang sapisira ugi krama desa, tan wenang ngawangunang saluiring upacara manusa yadnya ring wawidangan palemahan kahyangan desa. Yan mamurug, wenang kapidandha manut pararem;
- (2) Sane dados kamargiang sajeroning palemahan pura, wantah ngamargiang upacara pawintenan manut dresta.

- (3) Sang sapasira ugi krama desa, kaling ngamargiyang upacara manusa yadnya, patut masupeksa ring Prajuru Desa.

**Palet 5**

**Indik Bhuta Yadnya**

**Pawos 37**

- (1) Sajeroning Desa Adat Kebon Bukit, pacaruan manut ungguan, miwah sor singgih, luire :
- ha. Pacaruan desa sadakala :
- 1) Manca satha ngamasa-masa, kala Tileming Kasanga, magenah ring pempatan agung, kaemponin antuk krama desa;
  - 2) Pacaruan nangluk marana, kala rahina Tilem sasih Kaenem, magenah ring jaba Pura Dalem;
  - 3) Tabuh Gentuh, manut sakabuatan lan sakasidhan.
- na. Pacaruan desa padgatakala : rikala jagate kabrebehan, kageringan, kadurmanggalan, katiben Panca-bhaya, miwah sane siosan sane patut carunin;
- ca. Agung alit caru, manut ungguan macaru, babuatan pacaruan, kalih nista madhya, utama manut gagaduhan pura inucap.
- (2) Pacaruan ring pura Kahyangan, Pamerajan, Dadia saluire, manut dresta minakadi gagaduhan pura inucap;
- (3) Pacaruan kaling Tilem Kasanga, ring karang pomahan soang-soang manut sastra dresta, saha kalanturang antuk brata panyepian.

**PANCAMAS SARGAH**

**SUKERTHA TATA PALEMAHAN**

**Palet 1**

**Indik Tegal, Bangket lan Karang**

**Pawos 38**

- (1) Palemahan Desa, mauger antuk tri mandhala, luire :
- ha. Utama mandhala : Palemahan sane kaanggen genah pura, wiadin parahyangan;
- na. Madhya mandhala : Palemahan sane kaanggen, genah wawangunan, sakadi : banjar, kantor, miwah sane siosan;
- ca. Nista mandhala : Palemahan sane kaanggen setra, margi, rurung, telabah, papunduk, telajakan karang, genah ngingsanang wahana, miwah sane siosan. Sahanan Palemahan sane wenten ring wawengkon desa, yogya mangda madue babaledan wiadin wates sane pasti.
- (2) Sahanan Palemahan punika, ugi mangda madue margi, rurung, papunduk sane dados kaentasin;

- (3) Sang sapisira ugi pacang mapawangun pakarangan, pomahan, pura miwah sane siosan, patut ngutsahayang mangda madue margi;
- (4) Yan wenten pakarangan pura, pomahan, tegal, miwah Palemahan siosan kabebeng tan madue margi, rurung, utawi papunduk, sang madue patut ngatengahang babaoseka desa, Prajuru Desa yogya negdeg, ngutsahayang mangda polih margi malarapan sami suka;
- (5) Yan desa pacang ngalinggahang margi, rurung, minakadi makarya margi, rurung desa, saking sampun ingkup Pararem Desa kalih sang madue tanahe, yan nganggenggal, miwah Palemahan siosan, wenang ngamargiang sasempalan antuk desa tan naur pangangan tanah punika. Nanging yan madaging tatanduran, papayon, wawangunan saluire, desa patut ngicen prabea agung alit manut pararem;
- (6) Sahananing karang pomahan ugi mangda masengker. Pidabdab nyengker, magaleng kadulu. Panyengker sane sisi kangin miwah kaler, patut kakaryanin antuk sang ngenahin karang punika, sajaba karang ngele wiadin lingkehin rurung utawi palemahan suung;
- (7) Sang sapisira ugi ngenahin karang tegehane, patut naku, tegehe asukat tanah dangsah, sane tebenan, wenang nyusunin;
- (8) Telajakan karang patut kapiara antuk sang ngenahin karang punika soang-soang, mangda mapikenoh tur asri;
- (9) Yan wenten sinalih tunggil nyadia nyaleksek babaledan saluiring babaledan wiadin wawatesan, yogya katiwakan dandha manut werat ring an kahiwangane, saha mahayu sane kasleksek, kalih mrayascita sakabuatan, sane nyandang katibenin panyangaskara, indik degdeg wawatesan utawi babaledan manut dresta kuna;
- (10) Yan wenten sinalih tunggil ngaletihin, ngarucakin, ngarobedin, ngararabin, miwah saluiripun, nyorongang babanyon, yogya katiwakan dandha gung artha manut pararem, tur mahayu sane kaletihan, karucakan, karobedan, raraban inucap ring ajeng, saha mrayascita sane nyandang keni panyangaskara;
- (11) Yan wenten anak ngenahin palemahan sajeroning wawengkon Desa tan tinut makrama desa nganutin Awig-Awig miwah Pararem Desa, tan kalugra nganggen saluiring paduean desa, tan kalugra ngalaksanaang Panca Yadnya sajeroning Desa;
- (12) Sang sapisira ugi sane pacang ngadol, ngantahang, maselangang, majegang, masewayang, makedihang palemahan tegal, palasan miwah sane siosan sane magenah sajeroning wawidangan desa, ugi mangda polih panugrahan saking Prajuru Desa malarapan Paruman Desa;
- (13) Sang sapisira ugi pacang migunayang palemahan tegal, carik, pakarangan, sajaba pacang genah matatanduran, genah pomahan, yogya sangkaning palugrahan Prajuru Desa, sadurung polih palugrahan Sang Amawarat. Yan wenten mamurug sasampun polih kasambatsara antuk desa, sang mamurug katiwakin dandha manut pararem.

**Palet 2**

**Indik Kakayonan**

**Pawos 39**

- (1) Yan wenten wit-witan wiadin kakayonan ngungkulin Palemahan anak sios, sane ngawinang tiyeb, tampias, ngarobedin, asing kungkulan wenang ngatengahang ka desa, Prajuru Desa maritetes saha mituduhang sang madue mangda ngerancap, nebtob, wiadin ngarebah. Yan kantos ping 3 (tiga) pituduh de sane tan kalingu, wenang katiwakan dandha sang anikel tuduh, gung artha manut pararem. Kakayonan punika prasidha karebah antuk desa picundhangan;
- (2) Tanem tuwuh utawi tatanduran siosan sajeroning karang paumahan, tan kalugra tegeh ipun lintangan ring jan palit 11 (solas), utawi 5 (limang) meter, bungkil ipun adepa agung, utawi 2,5 (kalih tengah) meter saking panyengkere ngajeroang. Yan mamurug, wenten raris ngatengahang ka desa, yogya sang mamurug katiwakan dandha gung artha manut pararem, saha ngarebah, sajeroning 3 (tigang) rahina saking pamuput babaose;
- (3) Kakayonan sajeroning paumahan ugi mapiara mangda tan ngaletihin, ngarobedin, mamayen karang siosan, saking akah kantos daun ipun. Yan wenten mamurug, tan tulinga ring kakayonan due, wenten ngatengahang ka desa, Prajuru Desa yogya maritetes, saha nepasin manut panglokika kalih Pararem Desa;
- (4) Yan wenten wit taru mentik kantos ageng ring babaledan wates, saluiring babaledan muang wates, wenten ngatengahang ka desa, patut taru punika karebah, raris pinara tiga, apahtigaan mantuk ka desa, apahtigaan sang madue babaledan soang-soang;
- (5) Yan wenten sinalih tunggil nundungin tanem tuwuh, kakayonan, sane kasuatah pacang mamayen, wenang kabaosang ring sang madue. Yan akas sang madue, yogya katengahang ka desa. Prajuru Desa negdeg tanem tuwuh wiadin kakayonan punika. Yan manut panglokika, yogya tundungin, taler akas sang madue patut sepat gantungin. Yan jati kadi panyuatahe, yogya sajeroning 3 (tigang) dina, karebah picundangan. Sang madue katiwakan dandha gung artha manut pararem, dosane anikel tuduh. Yan tan yukti kadi panyuantahe, sang ngatengahang katiwakan dandha gung artha manut pararem, dosane angadakaken nora, tanem tuwuh wiadin kakayonan punika tan karebah;
- (6) Yen wenten sinalih tunggil nyadia nandur saluiring tanem tuwuh wiadin kakayonan sane pacang dados ageng, neseke ring babaledan, ring wates, papunduk, ugi mangda masupeksa ring panyanding esoang-soang, yan tan kapisukayang katur ring Prajuru Desa. Yan tan kalugra tan kapisukayang, pradene taler kapurug, yogya sang mamurug katiwakan dandha gung artha manut pararem, tur ngamademang tatandurane;
- (7) Sang sapasira ugi nyakap tegal, nandur tatanduran tanem tuwuh sane ngawinang tanahe andog ring tegal sasakapan, ugi mangda makarya pasobhayaring sang madue tegal inucap. Yan durung pinganan mapikolih tatanduran punika, sadurung mapikolih sator ipun 5 (limang) pelabuh, sajaba sangkaning kaiwangan panyakap raris kajabutin, yogya sang madue tegal naur panjala sawit-wit, gung artha manut pararem;

- (8) Sang sapisira ugi nyakap tegal, tan kawasa ngarebah tatanduran tanem tuwuh, yan tan polih lugra saking sang madue tegal punika.
- (9) Yan wenten wit-witan rebah antuk ka Panca bhaya tan dados kajarahin antuk sang sapisira ugi, yan wenten mamurug keni pamidandha manut panglokika.
- (10) Yan wenten wit-witan kateteb miwah karebah, raris niben wawangunan utawi tatanduran anak sios, prade katengahang ka desa wenang prajuru mamaosin tur niwakang pamutus manut pararem.
- (11) Tan dados marereh-rerehan saluire ring Palemahan utawi sasakapan tan due, yan tan kapisukayang, yan wenten mamurug, wenten raris ngatengahang ka desa, keni pamidandha manut pararem.

### Palet 3

#### Indik Wawangunan

#### Pawos 40

- (1) Sang sapisira ugi krama desa yan pacang ngawangun panyenger karang pomahan ring sawawengkon desa, patut masupeksa ring panyandinge. Yan tan radin yogya nunas degdegan ring Prajuru Desa. Prajuru Desane negdeg saduajeng ring sang mawicara.
- (2) Wawangunan ring Palemahan pecak tegal, palemahan suwung, sane sampun masanggah paon, palemahan punika prasida kabaos karang pomahan, duaning sampun katiwakan pangupakaran karang, patut madue rorong betel ka margi agung, sukat dados pacang ngalintangang papaga, duaning tan kapatut ngalintangang sawa ring tegal utawi bangket. Yan wenten mamurug, yogya Prajuru Desa niwakang tatepasan mangda sang mamurug mrayascita palemahan inucap.
- (3) Yan tan masanggah panguluning karang, kabaos akakubon. Tan yogya genah ngeraksa sawa. Yan wenten mamurug, yogya katiwakin dandha mangda mrayascita palemahan punika.
- (4) Sapisira ugi pacang ngawangun wawangunan genah ngalaksanaang upacara Agama, luire : Pura, Masjid, Gereja, Wihara, miwah sane siosan, ugi mangda wenten lekita palugrahan Prajuru Desa, kalih lekita palugrahan Sang Amawarat. Yan wenten mamurug kadi kinucap ring ajeng, kabaos tan sidha karya, tan wenang anggen, tur wawangunan punika yogya wangdeang.
- (5) Wawangunan sajeroning karang pomahan, ugi nganutin Tri-mandhala : Utama mandhala, inggih punika sanggar panguluning karang; Madhya mandhala, inggih punika pagenahan mapumahan; nista mandhala, inggih punika ngaran lebu.
- (6) Tan wenang ngungkulng capcapan wawangunan ka jeroning karang pomahan siosan tandue. Yan wenten mamurug, wenten ngatengahang ka desa, yogya Prajuru Desane negdeg, saha nyipat gantungin. Yan jati lintang sajeroning asasih (35 dina) saking puput babaose mangda sampun kapastika.

- (7) Yan prade wenten toyan capcapan paumahan ngecor ke margine utawi ke rurunge mangda kaabangin, toyan abangane mangda ngecor ring sor;
- (8) Tan wenang nganggen tembok umah wiadin tembok panyengker tandue. Wenang ya kasambatsara antuk sang madue. Yan akas sang kasambatsara, yogya katengahang ka desa, tur kabaosin antuk Prajuru Desa raris niwakang pamutus manut pararem;
- (9) Sang sapisira pacang mapawangun nepi ring margi ageng, nepi ring rurung desa, yogya mangda wenten lekita palugrahan saking Prajuru Desa, wiadin lekita palugrahan Sang Amawarat. Yan tan polih lekita palugrahan, ritatkala wawangunan punika katundungan tan polih prabea;
- (10) Sang sapisira ugi ngawengku karang pomahan, yogya urati miara kaasrian lebuw pakarangania, rurung pentasan pinih sor asukat karangnia ngalajur;
- (11) Sang sapisira ugi ngawangun utawi migunayang palemahan desa, ugi polih palugrahan saking Prajuru Desa lan Sang Amawarat.
- (12) Krama desa tan kadadosang ngenahang barang ring telajakan utawi ring pinggir margine lintangan ring 3 (tigang) rahina, sajaba polih lugraha saking Bandesa;

#### Palet 4

#### Indik Wawalungan

#### Pawos 41

- (1) Sane kinucap wawalungan, sakancan buron suku pat sane nyadya kapiara, sakadi : bawi, banteng, kambing, kebo, misa, jaran, miwah sapanunggilan ipun; taler watek makampid sane nyadia kapiara, sakadi: ayam, itik, angsa, dolong, miwah sabacakan ipun;
- (2) Sang sapisira ugi krama desa sane miara wawalungan suku pat, tan wenang ngalubar, mangda tan ngarucakin, ngaletihin palemahan tandue, miwah mamayen krama desa, jana pada. Yening mamayen keni pamidhanda manut pararem;
- (3) Sang sapisira ugi krama desa sane miara watek suku kalih, watek makampid, yatnain ugi mangda tan banget ngarucakin, ngaletihin, palemahan pomahan, tatanduran duen anak siosan, yan kantos nagrucakin tatanduran, palemahan paumahan kapidanda manut pararem;
- (4) Tan wenang ngangonang, negulang, ingon-ingonring palemahan tan due, minakadi tan sasakapan due, yan tan kapisukayang antuksang madue. Sang madue Palemahan, Prajuru Desa, Pacalang Desa, keliang-keliang asing mamanggihin, wenang nyambatsara sang madue wawalungan ika. Yan akas sang kasambatsara, wawalungan punika wenang taban. Prajuru Desa yogya niwakang pamidandha manut lokika, gung artha manut pararem;
- (5) Yening sarwa makampid sane kapiara, ngarucakin tatanduran, wawangunan lan palemahan wenang kataban. Indike naban mangda masaksi, saha kasupeksayang ka desa pramangkin, Prajuru Desa yogya mamaosin, niwakang pamidandha manut panglokika;



- (6) Yan wenten wawalungan ngeleb, mamegat ngeranjingin palemahan pura, kahyangan, setra, karang pomahan, miwah sane siosan lokikanen juga, yan tan nyadia kalebang tan wenang taban, tur katengahang ka desa;
- (7) Sang sapisira ugi ngarereh ulam ring tukade, miwah saungguaning ulam sajeroning Desa Adat Kebon Bukit, tan wenang nganggen tuba miwah listrik saluiripun, wiadin ngarusak empelan lan temuku. Yan wenten mamurug wenang katiwakan dandha gung artha manut pararem;
- (8) Sang sapisira ugi tan kalugra ngamademang utawi morosin luire : manuk, paksi, bojog, petu, luwak, kijang miwah sabacakanipun, yan tan ngarucakin tatanduran, yan wenten mamurug wenang katengahang ka desa pramangkin, kabaosin antuk Prajuru Desa saha katiwakin dandha manut panglokika, kalih Pararem;
- (9) Sang sapisira ugi krama desa ngawangunang kandang wawalungan buat adol atuku, yan kandang ayam, itik, miwah sapanunggilanipun, buat naluhang, miwah adol atuku, dagingan seket ukud. Yan kandang wawalungan suku pat, buat dagingan limang ukud, punika dados sajeroning karang pomahan. Yan lintangan ring punika daging kandange, tan dados wangunang jeroning karang pomahan, yogya kawangunang ring Palemahan sane mawaneng satoripun 100 (satus) depa saking Palemahan karang pomahan, sekolah, kantor, pura kahyangan, minakadi genah sane kakeker wiadin kapingitang antuk desa. Tur mangde madue lekita palugrahan saking Prajuru Desa lan Sang Amawarat.

**SAT SARGGAH**  
**SUKERTA TATA PAWONGAN**

**Palet 1**

**Indik Rangkat**

**Pawos 42**

- (1) Indik rangkat punika, manut desa kala patra, muang sima dresta, sane kapatutang tur katinutin antuk krama desa soang-soang, tan singsal ring uger-uger panagara, luire :
  - ha. Papadikan;
  - na. Ngarorod;
  - ca. Ngunggahin;
  - ra. Narimen utawi katrimenan.
- (2) Indik rangkat punika yan sampun mawidhi widhana pawiwahan, sanistania mabiakaon tur malukat, rangkat punika kasinangah puput parikrama;
- (3) Yan wenten anak istri krama desa, karangkatang antuk sang sapisira ugi, yan kantos arahina ring awengi saking dina matinggale saking jumahipun tan wenten pajati, yogya sang madue wirange nunas kanti ring Prajuru Desa mangda ngamargiang saserepan. Yan sampun sinah genahnia, ngararis ngamargiang panegdeg, saha nunas kanti ring Sang Amawarat;

- (4) Sang *sapasira ugi krama desa*, yan karauhan tamiu praya masinutan malarapan antuk *ngarorod, ugi mangda masadok miuningang ring Prajuru Desa*. Prajuru Desa *yogya maritetes, yan sangkaning tan patut pamargin rangkatnia*, Prajuru Desa *nguduhang mangda katur ring Sang Amawarat*. Yan wenten *krama desa mamurug, yogya sang mamurug keni pamidandha* manut *pararem*, tur tamiu *punika katundung saking Desa*;
- (5) Yening wenten *krama desa*, *ngamet anak istri pinaka rabi tan manut sima dresta minakadi sastra agama, yogya katur ring Sang Amawarat mangda kabaosin saha polih pamutus*;
- (6) Yan wenten *saking liwaring desa pacang muput rangkat ka wawengkon Desa*, *sang madue wirang luh, yogya nunas pasaksi ring Prajuru Desa, sinalih tunggil mangda wenten ngarauhin, tur anake istri sane marangkat ngarorod patut ngaturang pangeling-elingka desa manut pararem*;
- (7) Yan wenten *krama desa ngarangkatang anak istri sios ring magama Hindu, pawidhi widana pawiwahannia patut kalaksanaang sasampun anak istri punika masudi wadhani*.

### Ngarug sasana

#### Pawos 43

- (1) *Sapasira ugi krama desa mobotin anak istri sane sami-sami durung madue rabi, tur sabda kapariangken, yan katur bebaose ka desa, Prajuru desa patut ngutsahaang sang kalih mangda majangkepan alaki rabi, tur mawidhi-widhana pawiwahan manut dresta*;
- (2) *Sapasira ugi krama desa mobotin anak istri, sampun madue rabi, wirangnya patut ngaturang wicara punika ring Sang Amawarat. Yan sampun wenten pamutus saking Sang Amawarat, desa wenang niwakang pamidanda pawuwuh manut pararem*.

#### Palet 2

### Indik Palas Makurenan utawi Nyapian

#### Pawos 44

- (1) *Sane kabaos nyapian inggih punika, palas makurenan, sane sampun katiwakan pamutus antuk Sang Amawarat, minakadi sampun kakrabang ring sangkepan desa*;
- (2) *Yan wenten krama desa ngarangkatang sapian, sadurung tigang sasih utawi 105 (satus Lima) dina, saking dina palase, yogya sang ngarangkatang sapian punika keni danda pakerang manut pararem*;
- (3) *Krama desa sane nyapian, sasampun polih pamutus saking Sang Amawarat patut masadok miuningang ring Prajuru Desa, sakasesipun asasih (35 rahina) saking palase*;
- (4) *Yan wenten anak istri wit saking wawengkon Desa Adat Kebon Bukit, nyapian mawali ka desania, yogya sang madue wirange mrayascita marisudha anake luh punika saha kaupasaksi antuk Prajuru Desa*.

**Palet 3**  
**Indik Balu**  
**Pawos 45**

- (1) Sane kabaos balu inggih punika anak istri utawi anak lanang sane katinggal seda antuk rabine, wiadin anak lanang katinggal nyapian;
- (2) Yan wenten anak istri balu kandugi marangkat yogya rangkat punika kapuputang antuk wirang lakine, lan kaupasaksi antuk Prajuru Desa, yan babalon punika kari pageh;
- (3) Mungguing wawanengan babalon luh, ring indik wawarisan, minakadi sane saos-siosan, nganutin uger-uger sane karajegang antuk Sang Amawarat.

**Palet 4**  
**Indik sentana**  
**Pawos 46**

- (1) Mungguing sentana wenten kalih soroh :
  - ha. Preti sentana;
  - na. Sentana peperasan.
- (2) Prade pawiwahan tan ngewentenang sentana, kengin meras sentana maupasaksi sekala niskala sane kewastanin peperasan;
- (3) Peperasan sane kasinanggeh patut utawi sah ring desa risampun macihna:
  - ha. Ngemargiang upacara peperasan;
  - na. Kasaksinin olih Prajuru Desa, saha kesiarang ring paruman;
  - ca. wenten lekita pamikukuh saking Sang Amawarat;
- (4) sane dados keperas keanggen sentana kadi ring sor puniki:
  - ha. Anak sane meagama Hindu;
  - na. Kulawarga saking purusa, yan tan wenten kengin saking pradana, prade taler tan wenten wawu dados sekita karep.
- (5) Prade wenten sinalih tunggil krama desa meras pianak lanang wiadin istri sesampun kesungkemin antuk kulawarga, dadia, tur kakukuhang olih Sang Amawarat wau kadadosang tedun makrama.

**Palet 5**  
**Indik Wawarisan**  
**Pawos 47**

- (1) Sane wenang kawarisin, luire :
  - ha. Among-amongan ring desa, ayah-ayahan saurah-arih;
  - na. Utang-piutang sang kawarisin;
  - ca. Saraja due, bhrana, tegal, carik, tatamian lan sakancan kasugihan.
- (2) Sane wenang ngawarisin :
  - ha. Manut lalintih papernahan adoh tampek saking purusa tunggal sidhikara, tunggal dadia;

- ca Putra paperasan.
- (3) Sang sapisira ugi krama desa, yan tilar saking agama Hindu, tan yogya ngawaris sane kamulan patut warisin;
- (4) Ngedum wawarisan, kapatut pinih sor sasampun puput maabenang kalih ngalinggihang pitara sang ngawarisang brana kalih kasugihan punika. Sane dados dum, sajaba mangge padagingan pangaci-aci, minakadi saluiring sane mange piranti ngalaksanaang upacara agama, pustaka-pustaka sane kapingitang saluir ipun.

## SAPTAMAS SARGGAH WICARA LAN PAMIDANDHA

### Palet 1

#### Indik Wicara

#### Pawos 48

- (1) Saluiring wicara indik adat ring wawidangan desa, wenang rinaosan antuk Prajuru Desa. Yan tan kasidhan puput, Prajuru Desa ngaturang ring Sang Ngawiwenang;
- (2) Yan wenten wicara indik adat ring banjar, pamaksan, minakadi sekaa-sekaa siosan, yogya kabaosin antuk prajurunia soang-soang, yan tan kasidhan puput, wenang katengahang ka desa, Prajuru Desa yogya mamaosin;
- (3) Yan Pamutus wicara sane katiwakang antuk Prajuru Desa tan katinutin utawi tan kairing antuk sang mawicara, wenang sang mawicara nunasang ring sang patut mamaosin;
- (4) Yan sang mawicara tan tinut ring pamutus wicara sane katiwakang inucap ring ajeng, prasida sang mawicara tan kalugra polih patulung saking desa.

### Palet 2

#### Indik Pamidandha

#### Pawos 49

- (1) Pamidandha sane wenang katiwakang antuk Prajuru Desa, Banjar Adat, Pamaksan, Sekaa-sekaa siosan, sawawengkon Desa, sakadi ring sor puniki, luire :
  - ha. Dandha artha;
  - na. Upasaksi, dewa saksi, pangrarata lan sumpah;
  - ca. Dandha panyangaskara, luire; mrayascita, marisudha, miwah saluir ipun;
  - ra. Danda ngayahang ring desa;
  - da. Danda kadaut;
  - ta. Pamidandha siosan manut palugrahan Sang Amawarat.
- (2) Patiwak pamidandha, manut ungguan wicarane soang-soang, minakadi werat ring an wicara inucap, luire :

(7) Awig-Awig puniki kalinggatanganin antuk Prajuru Desa, luire : Bandesa, Pmadhen Kebon Bukit, Kelihang Banjar Dinas Kebon Bukit, Perbekel Bukit, Camat Karangasem, kakukuhang olih Bupati Karangasem;

(8) Awig-Awig puniki kalaksanaang ngawit dina pamastika punika kantos salantur ipun;

(9) Luir sang ngalinggatanganin :

ha. Prajuru Desa:

1) Bandesa,

Gusti Gede Wirya

2) Pmadhen Bandesa,

Gusti Putu Adnyana

3) Panyarikan,

Gusti Nengah Supatia

4) Juru Raksa,

Gusti Made Merta Rurus

5) Juru Arah,

Gusti Ketut Merta

6) Keliang Banjar Adat Kebon Bukit,

Gusti Putu Adnyana

na. Maka saksi :

1) Keliang Banjar Dinas Kebon Bukit,

Gusti Ngurah Widnyana

2) Perbekel Bukit,

I Wayan Sudana, SH., MAP

3) Camat Karangasem,

Cokorda Alit Surya Prabawa, S.STP

Pembina

NIP. 19771121 199612 1 002

ca. Bupati Karangasem pinaka murdha pamikukuh

Kalekitaang ring Kantor Bupati Karangasem,

duk rahina .....

tanggal Masehi .....

Reg. Nomor : .....

BUPATI KARANGASEM,

I GUSTI AYU MAS SUMATRI, S.Sos. MAP